

## I. DISPOSICIÓN XERAIS

### MINISTERIO DA PRESIDENCIA

**2529** *Real decreto 107/2010, do 5 de febreiro, polo que se modifica o Regulamento de organización e funcionamento da Inspección de Traballo e Seguridade Social, aprobado polo Real decreto 138/2000, do 4 de febreiro.*

A Lei 17/2009, do 23 de novembro, sobre o libre acceso ás actividades de servizos e o seu exercicio, incorporou parcialmente ao dereito español a Directiva 2006/123/CE do Parlamento Europeo e do Consello, do 12 de decembro de 2006, relativa aos servizos no mercado interior.

A dita lei indicaba, na súa exposición de motivos, a necesidade de proceder a realizar un exercicio de avaliación de toda a normativa reguladora do acceso ás actividades de servizos e do seu exercicio para adecuala aos principios que esta establece.

Este é o obxectivo da Lei 25/2009, do 22 de decembro, de modificación de diversas leis para a súa adaptación á Lei sobre o libre acceso ás actividades de servizos e o seu exercicio, que, no seu artigo 9, introduce unha serie de modificacións na Lei 42/1997, do 14 de novembro, ordenadora da Inspección de Traballo e Seguridade Social, modificacións que teñen como finalidade asegurar a colaboración e a cooperación entre autoridades con competencia para iniciar procedementos sancionadores nos distintos Estados membros, mediante a comunicación de feitos que poden dar lugar a sancións por outros Estados membros, cando estes se comprobaran no exercicio da actuación inspectora, podendo utilizarse como medios de proba os datos ou antecedentes que figuren nas administracións públicas dos correspondentes Estados membros. Nestes supostos prevese a interrupción de prazos de caducidade por imposibilidade de obter información debido a dificultades na cooperación administrativa internacional, e sinálanse como competencia exclusiva da autoridade central as funcións de colaboración e asistencia administrativa con autoridades dos distintos Estados membros.

É necesario, por tanto, realizar unha adaptación da normativa regulamentaria reguladora da organización e funcionamento da Inspección de Traballo e Seguridade Social ás novidades introducidas pola Lei 25/2009, do 22 de decembro, de modificación de diversas leis para a súa adaptación á Lei sobre o libre acceso ás actividades de servizos e o seu exercicio, na Lei 42/1997, do 14 de novembro, ordenadora da Inspección de Traballo e Seguridade Social.

Na súa virtude, por proposta da ministra da Presidencia e do ministro de Traballo e Inmigración, de acordo co Consello de Estado e logo de deliberación do Consello de Ministros na súa reunión do día 5 de febreiro de 2010,

DISPOÑO:

**Artigo único.** *Modificación do Regulamento de organización e funcionamento da Inspección de Traballo e Seguridade Social, aprobado polo Real decreto 138/2000, do 4 de febreiro.*

O Regulamento de organización e funcionamento da Inspección de Traballo e Seguridade Social, aprobado polo Real decreto 138/2000, do 4 de febreiro, queda modificado como segue:

Un. A alínea c) do artigo 15.1 queda redactada do seguinte modo:

«c) Comprobación de datos ou antecedentes que figuren nas administracións públicas; para tal fin, a Inspección poderá acceder a tales datos e antecedentes, proceder a cruzamentos informáticos e solicitar antecedentes ou información que

permita comprobar o cumprimento da normativa aplicable. Se do seu exame se deducen indicios de incumprimento, poderase proceder na forma disposta nos puntos anteriores co obxecto de completar a comprobación. Poderanse valorar tamén os datos ou antecedentes que lle subministren outras administracións públicas da Unión Europea.»

Dous. O número 1 do artigo 17 queda redactado do seguinte modo:

«As actuacións comprobatorias da Inspección de Traballo e Seguridade Social a un mesmo suxeito non se poderán dilatar por un tempo superior a nove meses continuados, agás dilacións imputables ao suxeito inspeccionado ou a persoas dependentes del ou que sexan debidas a dificultades na cooperación administrativa internacional, conforme o artigo 14 da Lei ordenadora da Inspección de Traballo e Seguridade Social.»

Tres. O número 3 do artigo 17 queda redactado do seguinte modo:

«As actuacións comprobatorias seguidas a un mesmo suxeito, unha vez iniciadas, non se poderán interromper por tempo superior a tres meses, agás que a interrupción sexa causada polo suxeito inspeccionado ou persoas dependentes del, ou sexa debida a dificultades na cooperación administrativa internacional.»

Catro. O número 4 do artigo 47 quedará redactado do seguinte modo:

«A representación, participación e colaboración administrativa na Unión Europea e nos restantes ámbitos internacionais nos asuntos relacionados coa Inspección de Traballo e Seguridade Social.»

**Disposición derogatoria única.** *Alcance da derogación normativa.*

Quedan derogadas cantas disposicións de igual ou inferior rango se opoñan ao disposto neste real decreto.

**Disposición derradeira primeira.** *Título competencial.*

Este real decreto dítase en exercicio da competencia estatal en materia de lexislación laboral, ao abeiro do disposto no artigo 149.1.7.<sup>a</sup> da Constitución española, en canto sexa aplicable a procedementos en materia laboral.

En relación cos procedementos en materia de seguridade social, o real decreto constitúe lexislación básica, ao abeiro do artigo 149.1.17.<sup>a</sup> da Constitución española, excepto no que respecta aos procedementos en materia de réxime económico da seguridade social, cuxa regulación queda amparada no título competencial correspondente do artigo 149.1.17.<sup>a</sup> da Constitución.

**Disposición derradeira segunda.** *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 5 de febreiro de 2010.

JUAN CARLOS R.

A vicepresidenta primeira do Goberno  
e ministra da Presidencia,  
MARÍA TERESA FERNÁNDEZ DE LA VEGA SANZ